



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma : Tir Yimym

tiryimym@aolima

tir yimym

TAPAK 6



Southampton-i manager Nathan Jones mapa nungi anentsüogo

CPIM, Congress, TIPRA Motha ajanga 'jungle raaj' bener arutsü: Amit Shah



VOL. XX NO. 122 (ADOK 122) DIMAPUR TENTONÜ (MONDAY)

TSÜKLAI (FEBRUARY) 13, 2023

₹ 5.00

Linük nung Khristantem longjemtsüla: John Barla

Dimapur, February 12, 2023 (TYO): Union Minister of State for Minority Affairs, John Barla-i Deobarnü linük nung Khristantem külemi longjemtsü aser parnok shilem agiba osang metetdaksütsü ayongzük.

Deobarnü Youth Oasis Centre nung National Christian Council Nagaland chapter ajanga

"Wholistic peace & progress" ta ser sentong ka nung jembidang John Barla-i iba tayongzükba agütsü.

"Khristantemi linük yangerba wadang nung shilem tulu agiogo. Khristantemi education, health mesüra social welfare amala wadangtem nung shilem tulu agia arur saka akhümtsübu mangur" ta pai ashi.

"Khristantem dak metokmeperi aliba ajanga tejakleni mouteter. Linük yangerba mapa nung asenoki tongtipang shilem agir aser mapa aika inyakogo. Khristantemi iba linük yangerba nung taküm ajunga bendanga agütsür tenzuka arur" ta Barla-isa ashi.

"Khristantem tsüingda telemsa lir. Yamaji süaka Khristantemi pei

pei sasep nung school, health centres amala lapoka lir aser loktiliba tenzükker" ta paisa shisem.

"Tesüiba sorkar mapang Khristantem kanga tsübutep aser tanü-a tsübuteper. Asenoki linük yangerba nung shilem tulu agiogo anungji Khristantemi kechi tsübutep ali?" ta Union Minister of State for Minority Affairs-isa astüingdang.

2019-20 nungi 2021-22 nung Ministry of Minority Affairs-i Pradhan Mantri Jan Vikas Karyakram (PMJVK) kübok mapatong tulu 10 agizükogog aser iba atema Rs. 22191. 50 lakhs lemsüktsüogog, ta paisa metetdaksü.

Item mapatongtem ya Niuland district nung lir aser iba nung hostels 3, Residential schools 2, Community Health Centre 1, 200 bedded Hospital 1, Primary Health Centre 1, Community Service Centre 1 aser working women hostel 1 lir ta John Barla-isa ashi.

Nübortem nem social security agütsüba centre sorkar scheme aika Nagaland nung takok ngua inyakogo ta paisa shisem.

President Murmu-i Governor tasen shim, tejenpur melen

New Delhi, February 12, 2023 (Agencies): India President Droupadi Murmu-i Maharashtra governor Bhagat Singh Koshyari aser Ladakh lieutenant governor RK Mathur nati sodi meshiba agizükba sülen state aika nung Governor tasentem shimogog aser teinyakdakpurtem melenogog.

President Murmu tetuyuba ajanga Governor tasentem shimer rongnung BJP lennir 4 aser taoba Supreme Court judge S Abdul Nazeer nunger dena lir.

Lakshman Prasad Acharya-i Sikkim, C P Radhakrishnan-i Jharkhand, Shiv Pratap Shukla-i Himachal Pradesh aser Gulab Chand Kataria-i Assam nung Governor inyaksü shim. Külen Jharkhand governor Ramesh Bais-i Maharashtra governor BS Koshyari melenzükogog.

Maneni Arunachal Pradesh

Brig BD Mishra (retd)-i Ladakh lieutenant governor RK Mathur melenzükogog aser Andhra Pradesh nung governor atema retired Supreme Court judge Nazeer shim.

Lt Gen K T Parnaik (retd) nem Arunachal Pradesh governor inyaksü lemsüktsü aser Manipur governor La Ganesan-i Nagaland governor inyaksü.

President Murmu-i Governor shimba/melenshiba:

Lt. General Kaiwalya Trivikram Parnaik - Arunachal Pradesh governor.

Lakshman Prasad Acharya - Sikkim governor.

C.P. Radhakrishnan - Jharkhand governor.

Shiv Pratap Shukla - Himachal Pradesh governor.

Gulab Chand Kataria - Assam governor.

Justice (Retd.) S. Abdul Nazeer - Andhra Pradesh governor.

Andhra Pradesh governor Biswa Bhusan Harichandan-i Chhattisgarh governor inyaksü.

Chhattisgarh governor Sushri Anusuiya Uikye-i Manipur governor inyaksü.

Manipur governor La. Ganesan-i Nagaland governor inyaksü.

Bihar governor Phagu Chauhan-i Meghalaya governor inyaksü.

Himachal Pradesh governor Rajendra Vishwanath Arlekar-i Bihar governor inyaksü.

Jharkhand governor Ramesh Bais-i Maharashtra governor inyaksü.

Arunachal Pradesh governor Brig. (Dr.) Shri B.D. Mishra (Retd.)-i Ladakh Lt. governor inyaksü.

NATIONALIST DEMOCRATIC PROGRESSIVE PARTY (NDPP)

Facta non Verba

• **STABLE GOVERNMENT**

• **PROGRESSIVE VISION**

• **MATURE LEADERSHIP**

• **MOVEMENT FOR UNITY**

NAGALAND - TOWARDS A STATE OF EXCELLENCE



PUBLISHED BY : NDPP MEDIA & COMMUNICATION COMMITTEE.

FOLLOW US @NDPPOFFICIAL

"Tetemsü lenirji o tanang jembiba agi masü mesüra nisungi sabuba agia masü saka mapa takok ngua bener otetba dang ajar ". Peter Drucker - Ungma Baptist Arogo Laishir Telongjem Clean Election Tayongzükba

Dimapur 1 AC nungi BJP candidate Tovihoto Ayemi nübuyim tenzükogo



Dimapur 1 Assembly Constituency nungi BJP candidate, H Tovihoto Ayemi-i Honibarnü pa election nung tokteptsü sangdongba sentong nung jembidang tangokba noksa nung angur.

Dimapur, Tsüklai/February 12 (TYO): Dimapur 1 Assembly Constituency nungi BJP candidate H Tovihoto Ayemi sangdongba aser sarasademtsüba sentong ka Honibarnü Genesis ground, Naga Colony, Dimapur nung agia liasü.

Iba sentong nung jembidang, 2013 küm pa yimtenren nung tetsüng ajemok tenzükba mapang Tsüngrem temoatsü meshia sarasademer tenzük, ta

Tovihoto-i ashi aser party nung inyaker temi iba ama sentong ayongzükba atema pelaba lematepa liasü.

Dimapur ya tesem ajaklen nungi adenshia aliba tesem ka lir, kong kin ajunga nungi nüburtem adenshia alir. Anungji nisung kati ka akumtsüboa aser yaritepa alitsüla, ta pai ashi aser nisung shinga senzüka metoktsütsü, ta ashi.

Ato Kilonser Narendra Modi lenisüba kübok scheme balala

agüja state densema linük tesem balala nung nüburtem ajangzükba indang pai iba sentong nung ashi.

NDPP aser BJP ya election magidang alliance yanglua lir aser aruya aliba election nung alliance partner ka ama inyaktüsü, ta pai ashi.

Iba sentong nung WSBK, Executive secretary, Dr. Rev. Phughoto Sema ajanga candidate asoshi bendanga agüja sarasademja liasü.

Peren district nung NSAP/DBT/NFBS old age pension agütsütsü

Dimapur, Tsüklai/February 12 (TYO): District Welfare Officer Peren I.Tsungrosongla Ao ajanga sangdong ka nung ashiba agi, NSAP Schemes kübok non-DBT list nung alirtem nem ita trok atema pension cash payment ajanga agütsütsü.

Ita trok atema state old age pension agütsüba den külemi NFBS state based Blind and invalid Scheme, state additional Disable list 2017-18 state based scholarship for Disable students amala agüja aliba anogotem nung agütsütsü.

Jalukie nung February 7, 2023 nü agütsütsü, Peren nung February 10, 2023 nü agütsütsü, Tening nung February 13, 2023 nü agütsütsü, Athibung nung February 16 aser Nsong nung February 17, 2023 nü agütsütsü.

NSAP Scheme kübok teyari agir ajaki Aadhaar aser Bank Account indang photocopy bener arutsüla, aser itemji medeni senotsü magütsütsü, ta District Welfare Officer I.Tsungrosongla Ao ajanga ashi.

Item kuli kakat tem den külemi kinungbo malir/amitsür pensioner

temi pei alidak putir mesüra pastor nungi tezülua tejangja bener arua agütsütsüla, aser aji medeni senotsü magütsütsü, ta sangdong ajangasa ashi.

Ano NSAP densema disabled scheme küboki aita beneficiaries temi disabled certificate copy ka-ka bener arutsüla aser teyari agirtem jangjatsü asoshi UDID bener arutsüla.

Item totuyuba sülen manidakteter nem senotsü teyari magütsütsü, ta sangdong ajangasa ashi.

Modi sorkari mapa inyaker temeden bener ogo: CPI (M)



Assam kübok tesem balala nungi ASHA aser Anganwadi nung inyaker aser aluyimer tem Honibarnü Guwahati nung adenshia sorkar dang takangba agütsüba noksa angur.

Guwahati, Tsüklai/February 12 (Agencies): Assam kübok tesem balala nungi ASHA aser Anganwadi nung inyaker aser aluyimer tem Honibarnü Guwahati nung adenshia sorkar aser mapa agütsür dang nungi 'manoni' (honorarium) masü 'mazuri' (taa) meshia takhangba agüja liasü.

Parnoki Centre nung Narendra Modi-i aniba BJP sorkar aitsü aser pa indang sorkari mapa inyaker (working class) temeden bener ogo, ta aitsü.

Guwahati nung aliba Sonaram

School playground nung 10 buba Construction Workers Federation of India (CWFI) mungdang mezüngbuba anogo nung parnoki iba senden nung shilem agia liasü.

Iba senden nung jembidang CPI (M) lenir tejen Hemen Das-i ashiba agi, 2014 küm nungi Modi sorkari linük nung mapa inyaker anema mera agiba ama danga sorkari agia mali.

"Iba yongji ASHA aser Anganwadi workers nungi tenzükba mid-day meal cooks tashi nisung ajaki pei taa meshia

adenshia lir. Parnoki parnok mapa ya regular kumdaktsüner, anungjidang par teyari shidak angutsü. Parnoki 'manoni' masü 'mazuri' meshir," ta taoba mapang MLA inyaksang aser communist lenir tejeni ashi.

Iba senden nung state tesem ajungalen nungi arua shilem agi, ta CPI (M) legislator Manoranjan Talukdar-i ashi.

"Modi sorkari nüburtem temeden agiener. Kong südir süaka joko nüburtem adenshia sorkar indang 'anti-workers policies' anema longkak aiter, ta Talukdar-i ashi.

Kohima nung election osang abentsüatemaworkshopayonger

Dimapur, Tsüklai/February 12 (TYO): Election Reporting atema Media Workshop anogo ka Hotel Vivor, Kohima nung February 14, 2023 anepdang 10:30 ako nungi agitsü.

Iba sentong nung Additional Director & HoD IPR, Dzüvinuo Theünuo ajanga iba workshop ayongba nükjidong rateta ashitsü aser iba sülen CEO Nagaland. Shashank Shekhar, IAS ajanga jembitsü.

Training session nung Senior

Journalist, Sunzu Bachaspatimayum ajanga 'Challenges and Opportunities in Election Coverage' onük nung ajemdaker jembitsü aser Editor-in-Chief, East Mojo, Karma Paljor-i 'Elections and Media in Digital Times' indang onük nung ajemdaker jembitsü.

Maneni Joint Director IPR, Asangla Imsong-i anir sensaksemba session agitsü aser iba sülen chiyongba mapang alitsü.

Assam nung menoknok magnitude 4.0 anok

Guwahati, Tsüklai/February 12 (Agencies): Deobarnü Assam kübok Nagaon nung menoknok magnitude 4.0 anoka liasü. Iba menoknok ya nikonngang 4:18 ako nung anoka liasü, ta National Center for Seismology ajanga ashi.

Iba menoknok ajanga takum samatsüba mesüra ki-o-jen raksatsüba osangtem tang tashibo mali, ta ketdangsur sangdong ka ajanga ashi.

Menoknok ya Nagaon district tiyong sür kilometre 10 tarok nung anoka liasü. Menoknok tiyong sür anokba tesem ya central Assam nung

Guwahati nungi kilometre 160 shi pilar Hojai anasa lir.

Anasa aliba West Karbi Anglong, Karbi Anglong, Golaghat aser Morigaon district tem nunga tera anokshia liasü aser ano Brahmaputra ayongkum nung aliba Sontipur nungia metet, ta osang ajanga ashi.

Honibarnü Gujarat kübok Surat district nunga menoknok magnitude 3.8 anoka liasü. Iba menoknok ya anepdang 12:52 ako nung Surat west south west (WSW) tsütsü kilometre 27 shi pilar anoka liasü, ta Institute of Seismological Research (ISR) ketdangsur temi ashi.

Meghalaya election: Congress-i electricity angati agütsütsü nangzük

Shillong, Tsüklai/February 12 (Agencies): Meghalaya nung opposition Congress nem vote agüja sorkar tentetra below poverty line (BPL) nung aliba kilen shia power unit 200 angati agütsütsü, ta parnoki Honibarnü nangzük.

Züngmok, turmeric, leptsü, black pepper aser alu nungi züsentetba danga osettem atema 'minimum support price' agütsütsü aser ano health care services angati agütsütsü, ta parnoki nangzük.

February 27 nü assembly elections atema manifesto sayatsüba mapang party lenir tain, Jairam Ramesh-i ashiba agi, BJP kübok Meghalaya nung 'cultural aser independent identity' lendong nung lir.

Congress manifesto nungya Meghalaya nung KG nungi Class 12 tashi azüngser tetsür agütsütsü shia lir aser iba yagi tetsür nem tashi temeden agütsüba nung kanga yaritsü aser par nükla, mangdang aser tejangraba inyaktetsü, ta Congress leniri ashi.

Congress-isa BPL jenjang nung alir kilen shia kilem tajung agütsütsü nangzük.

"Tamangba yimsü tsütsü lokti balala adenshitsü atema ki-o-jen yanglutsü asoshi corpus funds ama sen crore 500 shi agütsütsü," ta Ramesh-i manifesto athishia ashi.

Party ajanga university ka amenoktsü sentong benoka lir, kong market-i aginüba course

tem agütsütsü.

Congress-isa Special Urban Police Force ka amenoktsü nangzük aser iba ya nüburtem asoshi tajung asütsü aser yimti nung mapa tamajung inyakba azioktsüsa technology tasentem inoka yanglutsü, ta ashi.

BPL kilen shia nem küm nung pezüben LPG cylinder angati agütsütsü, mass entrepreneurship ajanga Meghalaya nung kilen shia mapa ka-ka agütsütsü, ta Congress-i nangzük.

"Linük nung tongshi pezü buba (fourth pillar) senzüka yuja lir. Onoki iba yimyaji melenshitsütsü. Accredited journalists ajunga nem pension tajung aser danga teyari agütsütsü," ta ashi.

Meghalaya nung sorkar tentetra party-i tesayur ajunga indang jenjang tajungba kumdaktsütsü aser itasen agütsüba nung menua malitsü.

"Pei temeden asoshi aser tesayur temi longkak aittsü menügdaki akumtsü. Onoki nenok aser ner mapa akumtsübor aser nenoki anibelem mesasai inyakba pela agizüker," ta Congress manifesto nung shia lir.

Congress-isa tetsürtem atema market amenoktsü nangzük, kong "Proudly Made in Meghalaya" tag aliba oset tem alitsü aser ayoktsü.

State nung clean & green technologies amshia power 500 MW bendenloktsütsü, ta Congress-i sentong yanglua lir.



February 12, 2023 nü Srinagar nung AAP züngsemtemi BJP office kima Adani Group ochimashi ken o anema longkak aitdang tangokba noksa nung angur. AAP central Kashmir youth president Jibrán Dar leniba nung party nung inyakertem Jawahar Nagar nung adenshir Ato kilonser, Narendra Modi aser Gautam Adani na anema yimyim ayima liasü.

Congress Tir, Mallikarjun Kharge-i Opposition senden ayonger

New Delhi, Tsüklai/February 12 (Agencies): Congress Tir aser Rajya Sabha nung opposition lenir, Mallikarjun Kharge-i Hombarnü opposition party tem senden ka ayongzükogo; opposition party tem sendenji Parliament nung Kharge indang office nung amentsü.

Hombarnü ayongzükba senden nungji Rajya Sabha nung opposition party temi sorkar anema onük balala nung nokdaktsü atema asalentong yanglutsü asoshi lir.

Hokolbarnüa Mallikarjun Kharge-i, Hindenburg Research-i Adani Group nem ochimashi tai tonglokja aliba onük ya bushisüngdangtsü atema Joint Parliamentary Committee (JPC) nem agütsüsüla, ta takhangba agütsüogo.

Osangbenertem senden nung jembidang Kharge-i, "Adani ochimashi ken o ya bushisüngdangtsüla masü no? Iba ken o ya JPC nem agütsüsüla masü no? Adani business atema public sector

banks-i invest asüba senotsü atema o lemteptsüla masü no? Iba nung ya nüburtem meyong senotsü densema lir. Kechiba iba sorkari Adani tenüng tetshitsü atema arendaker?," ta asüngdang.

Kharge-i, Adani group of companies atema Modi-i agent ama inyaker, ta tai tongloktsü.

Congress national Tir, Kharge-i, "Modi-i Adani atema agent ama inyaker Sri Lanka o Bangladesh na nung pa nem tenders agütsü. Nisung ajaki ibaji meteta dang lir," ta ashi.

Linük nung regulatory bodies aija Kharge-i, "RBI, SEBI, ED, Corporate Affairs Ministry, Income Tax aser CBI tasü ama reprangteter. Yangi ochimashi densema alibaji parnoki mereprangteter no? Parnoki Adani mangur asü? Asen rejutem tashi mait, anungji sorkar dang tasüngdangba akatsüji asen teinyaktsü mapa. Nüburtemi parnok melen asenok Parliament-i yok, anungji nüburtem kümzüksü atema asenoki inyaktsüla," ta ashi.

"Onoki Parliament nung tebilemtsü onük aika benoktsü meranga liasü saka Ato kilonseri tasüngdangba ajak paidoker election atema jembiba den pasasa teyaksanga dang jembir," ta Congress tongtiisa metetdaksü.

Hokolbarnü Rajya Sabha nung Opposition-i rongrong adokdaktsüba ajanga linük tatong Tir aser Rajya Sabha Chairman, Jagdeep Dhankhar-i kanga jashia longkak aiter MP tem dang tekümdangtsü metetdakja liasü.

Rajya Sabha nung Congress-i, Ato kilonser Modi-i industrialist Gautam Adani den tesendaktep ayur, ta tai tongloktsüba sülen Union Minister Piyush Goyal aser Kharge na o langtepa liasü; iba sülen opposition MP temi yimyim ayima longkak ait.

January 24 nü US nung amenoka aliba Hindenburg Research-i report ka ajanga Adani Group-i ochimashi mapa balala inyakba jungkai adokja liasü.

Tamil Nadu nung auertemi ATM pezü nungi sen lakh 86 auya

Thiruvannamalai, February 12 (Agencies): Amongnü anepdang züngia 2:00 ako meta Tamil Nadu state kübok Thiruvannamalai district nung mejangjaba auertemi gas welding amshia sen lakh 86 dak tema auyaogo, ta police-i metetdaksü.

Forensic tsütsü mongintem aser police-i CCTV noksa aser

meiyongnem ajanga kuli mebushiteter, kechiyong auertemi sen auyaba sülen ATMs ji rongdoktsüogo.

ATMs pezü rongnungji asembo State Bank of India (SBI) indang liasü aser ATM asemprongji Polur railway station, Cuddalore-Chittoor Road nung liasü. Tanga ATM kaji India One indang liasü aser

ibaji Kalasapakkam area anasa sorkar school ka kima liasü.

SBI indang ATMs asem nungji- Thandrapattu branch indang ATM nung sen lakh 30, Mariamman branch ATM nung sen lakh 33 aser Polur town nung aliba ATM nung sen lakh 20 liasü. Kalasapakkam town nung aliba ATM nungji sen lakh 3 liasü.

Ramesh Bais Maharashtra Angh shimogo

New Delhi, February 12 (Agencies): Linük Tir, Droupadi Murmu-i Maharashtra Angh, Bhagat Singh Koshyari-i sodi meshiba shidi agizükogo; taoba ita pai Ato kilonser dang pa Angh menden nungi anisüngzükner, ta lemsatapa liasü.

Arrshi küm 81, Koshyari-i küm asem dak tema state tenzükba liasü. Pa melen Maharashtra Angh menden atema arrshi küm 75, Ramesh Bais shimogo.

Ramesh Bias ya tang Jharkhand Angh teinyakdak lir, aser Jharkhand nung pa melen Angh inyaktsü atema C P Radhakrishnan shimogo.

Amongnü sorkari Angh trok shimogo aser parnok rongnung retired Supreme Court judge S Abdul Nazeer den BJP lenir pezü lir. January 4 nü mapa nungi anisüngzüksang, Justice (Retd) S Abdul Nazeer Andhra Pradesh Angh shimogo aser Andhra Pradesh Angh

teinyakdak, Biswa Bhusan Harichandan Chhattisgarh Angh shimogo.

Manipur nung tang teinyakdak Angh, La. Ganesan Nagaland Angh shimogo aser Sikkim nunga Angh, Lakshman Prasad Acharya shimogo.

Angh shimba BJP lenir pezü rongnung Uttar Pradesh nungi Lakshman Prasad Acharya aser C P Radhakrishnan na lir aser Assam nungi Shiv Pratap Shukla aser Gulab Chand Kataria na lir.

SANGDONGER

26 Aonglenden Assembly constituency NDPP Youth organization nung onok ketdangpurtem primary aser active züngsem nungi anener aser Wb. Toshipokba Lkr aser O Tinu na yaritsü lemtetogo :

1. Imtiusang Imsong - President, Youth 26 A/C
2. Imsuwapang Jamir - President, Sangtemla Unit
3. Imsünungsang - Vice President, 26 A/C.
4. Tekalong - Secretary, 26 A/C.
5. Yangernungsang - Secretary, 26 A/C.
6. Tiasunep - Vice president, Sangtemla unit
7. Limachuba - Vice president, Sangtemla unit
8. Anungba - General Secretary, Sangtemla Unit.
9. Talisunep - Secretary, Sangtemla unit.
10. Moanungsang - Secretary, Sangtemla unit.
11. Likokyanger - Secretary, Sangtemla unit
12. Sentinaro - Secretary, Sangtemla Unit.

Tanü SC nung Bindal aser Kumar nati judge tenangzükba agitsü



Justice Rajesh Bindal aser Justice, Aravind Kumar na noksa nung angur. Hombarnü Chief Justice of India, D Y Chandrachud-i ketdangsüa tena nem Supreme Court nung judge tenangzükba agidaktsütsü.

New Delhi, February 12 (Agencies): Hombarnü Justices- Rajesh Bindal aser Aravind Kumar nati Supreme Court nung judge inyaktsü atema tenangzükba agitsü; Chief Justice of India, D Y Chandrachud-i ketdangsüa tena nem tenangzükba agidaktsütsü.

Justice Bindal ya Allahabad High Court nung Chief Justice liasü aser Justice Kumar ya Gujarat High Court nung Chief Justice liasü.

Tenati judge tenangzükba agiba sülenbo Supreme Court nung menden ajak (34) abensatsü, kechiyong tang SC nung judge menden tazüng ana lir.

Justice Rajesh Bindal ya Punjab & Haryana High Court nungi lir aser pa 2021 küm October 11 nungi Allahabad High Court nung chief justice inyaka liasü.

Pa 1961 küm April 16 nü aso aser pai 1985 küm Kurukshetra University nung LL.B renemba sülen 1985 küm nungi Punjab & Haryana High Court nung inyaka aru; iba sülen 2006 küm March 22 nü Punjab & Haryana High Court nung judge aküm.

Allahabad High Court website ajanga ashiba agi, Punjab & Haryana High Court

nung Justice Bindal-i ken o 80,000 shi nung obendang agütsüogo.

Pa Jammu & Kashmir High Court nung November 19, 2018 nü tenangzükba agi aser Union Territory of Jammu & Kashmir aser Union Territory of Ladakh common high court nung acting Chief Justice shima liasü.

2021 küm January 5 nü pa Calcutta High Court nung judge shimba sülen 2021 küm nungsa April ita 29 nü high court nung Chief Justice shima liasü.

Ano külen Justice Aravind Kumar ya Karnataka High Court nungi lir aser 2021 küm October ita nungi pa Gujarat High Court nung chief justice inyaka liasü.

Pa 1962 küm July 14 nü aso aser 1987 küm advocate akümba sülen 1999 küm Karnataka High Court nung additional central government standing counsel shima liasü.

2002 küm pa Regional Direct Taxes Advisory Committee nung züngsem shim aser 2005 küm Assistant Solicitor General of India shima liasü.

2009 küm pa Karnataka High Court nung additional judge shimba sülen 2012 küm December 7 nü permanent judge shima liasü.



TIR YIMYIM

YIMOBILEM (EDITORIAL)

DIMAPUR TENTONÜ, TSÜKLAI (FEBRUARY) 13, 2023

Ni sen kwi jenjang ?

Nagaland tesem ajaklen election nung toktepertemi vote agütsütsü pur sen agi alitsü merangba aser vote agütsütsü purtemi pei vote senyong ayoktsü merangba osang angashir. Aji oda, temeimtsüka election nung toktepertemi ashiba agi, nübortem mozü ki tajung nungdakba indang mejembir, government school tajungba kuma anepaludaktsünüba indang ojang kata mesuoker aser light junga arudaktsünüba indanga shingaia kecha mashir saka sen aser sen otsü dang jembir. Aji shitak süra, asenok asoshibo election ya 'bazaar' amai ka dang kumogo. Anungji, nisung shia peisasa pei taküm jenjang ya sen kwikashi jenjangbo asütsü (?) ta bilemdanga sentak ataktsübaji kanga tongtibang kumogo. Joko, tanü asungbo kidang metsüba an tulubo noklang pongo agia mangur. Aji oda, broiler an ka odang nung sen noklang asem pezü kabo asütsü. Kasaji azüa tajungbo sen lakh junga agi alir. Akbo tejembidangtsüla masü, seret 100 ak mang ka nung sen meyirijang semer-lirbosa asütsü. Kasaji nashia talidangtsüla masü, nashi teyu ka alidi asünung meyirijang tenembo adoktsü. Aji oda, mapa nung amshiba shiruru kor aser shitibo lakh tema agidang angutsü. Item shiruru jenjang denji kodang asenoki asen vote ayokba jenjang medemdangdir, ashiko azü mesüra ak ka jenjang dang nungi teküpbokba asütsüa akok. Nisung taküm ya chiyongtsü kisung agi taküm malir ta Yisui moiying dang ashiba to shitaka ta tanüang ano tali jangjaa angateter, kechiyong chibo tebok sünga chiyong saka asenok tangar tsüngdang mera maket meshimetsür aser alar jenjang nung lira, iba taküm jenjangji kechi sütsü ? Aji oda, election nung asen temeten aser asen taküm jenjang ak ka jenjang dang teküpbokba yong ayokbaji tatem ser, election temer asenbo nisunga masü ama tangar kiküm ajangaa mekaotet aser tangar o a kata melangtet senso tajung ka agi sensoa masü ama litetra, iba taküm jenjangji nüchi purtem rongnung züngoktsü na ? Ashiko, election nung candidate dang sen yong asen vote ayokba to par register nung züluoka yua alitsü akok. Aji oda, asenokibo election temer par dang sen meshiba to amadoktsüa akok, saka paribo mamatsü, anungji parnokki asenok bilemtet dang aser asen jak angudang temulung nung menüja bilemetsü. Asenoki memetet ser tangari asenok mezüngmeshibaji yamaji mezüngmeshir, kechiyong parnok tsüngdang asenokji nisung masü saka küm ka ajepba ak dang nungi teküpbokba shiruru amai akümer. Aji oda, election temer asenoki adokdaksüba tatar yimsüsür-a majurutet akümbaji, am tesa agi masü saka nisung takümji ochi agidang taküm alitsü ta mangatet inyakba ajanga lir. Tadokbo asenok vote agi adok saka vote ajungaji dokan nungi alia bener arua enok amato ajak sen agi alizükba vote süra, idakji kechi meraket aser akhüm ali ? Iba tatar yimsüsür jagi asenok asoshi kechi tajung inyaktüsü imlar ? Iba yimsüsür sang jagi pelashishia asenok bushia arua asen nungdak inyaktüsü asü ? Atangji, alima nung taküm aliba aser maliba oset shia pei pei jenjang lir saka nisung taküm ka jenjangbo matakzütet aser nisung ka temeten ya alitsü aser ayoktsü makokba akhüm aser meraket shilem ka lir. Aji oda, pei temeten ayokba nisungji alima nung shingaia meraketa mezüngshitsü aser pa mesüra la nemjibo kishia melapoktsütsü. Asen taküm ya aika masü aser alima nung aiben alitsüba taküma masü, saka asen ya taküm ka dang aser khen dang alitsü. Idangji asenbo election aru shia pei temeten yoka dang taküm tatsüka ya atemtsü na ? Joko, alima ya arishiaka memenep terenlok maparen aika nung renloka odagi. Alemlibo mopong nung ola dang aru, saka tanübo noksa den tezüluba dena arur , ya koda ? Joko, bank aser shishilemdakia tsüngdong aotsü menüngdaker, kechiyong mopong nung dang senotsüa yokteper, ya kechi ? Alima nung iba amai shisatsü renlokba mapang ka nung asenokbo azü aser ak ka jenjang masü kuma alitsü na ? Ibai asenok asoshi kanga junga bilemdangtsüba mapang lir. Sen agi aser temeten yoka yimsüsür mashi ka shimtsü asü (?) mesüra sarasadema tangatetba agi tanü putu den peta tangatet aser teyakyak aser nübortem meimba nübo shimtetsüsa lanurtem rongnung election aitsü ajungshitsü ? Tangbo asenoki sen dang meshirji, taküm piyong sen bendentsü akokertemi dang election aier, ajisüaka kodang asenoki sen agi masü tangatetba agi yimsüsür shimtsü mulungtetdir, idangjibo sen makayonga nübortem dang meimba shisatsü akar tashitemeteter lanurtem aika election-i aitsü mulungtettsü. Ashiko, taküm küm asoshibo menur asütsüa akok, saka tan election nungi tenzüka asenoki asenoksasa asen mulungjang nung ni ya tayokba oset ka asü (?), ni ya sen kwi jenjang ta asüngdang tenzükdü.

OLEMSABANG

MOKOKCHUNG 27 KIMUNG

~ Akok Walling, Kumlong Ward, Mokokchung.

Yihovai asaa watet -

Ni Ao milen,

Ni Naga sangwa,

Kin yimsoshiba nakotsüng,

Kotaker nükrangdong.

Legislator Chubatemsü Iijen,

Legislator Shilukaba Iijen,

Legislator Tekasosang Iijen,

Legislator Arienba Iijen,

Legislator Koramoa Iijen,

Legislator Lisenba Iijen,

Legislator Takoyaba Iijen,

Legislator Asüngba Iijen,

Legislator Nokzenketba Iijen,

Legislator Nüngsangyabang Iijen.

Par ketmong tekümsa

Par mishi tewangwang.

Kü tawa-lim tila masü, Tesashi;

Kü shisatsü tebenja masü, Tekümkü;

Kü salang temeyoktep masü, Tangatet.

Oh, kü kilang mentetdi -

Kisemer kümdanga aيتدakjang,

Teshitet lenir adokdakjang,

Ochi mapa indakjang,

Yimliket nübu züindakjang,

Ozüng lateter wadabang

Ne meyonger 'sütsü moajang.

Jo!

Kü alulem, kolek agi

Ni Chionga ajemer

Ni meshimetsür masü.

Tsüa! Saka Yihova,

Naga lima amangbapur madak

Amokmeren rishikangshi arudagi!

Ni aser ozü kimungbo Na asoshi.

ELECTION NUNG NÜBUR TEINYAKTSU, TEMEDEN ASER TEMERENSHI

~ I.Imkong Jamir Advocate, President, Mokokchung Bar Association.

Linük ajak nung sorkar ka kümteta meliang nübur madak yimsü mesütet. Nübur meteni yimsü asuba linük kar nung lir aser iba dang "Martial Law" (Military/Army Rule) ta ajar. Tanü asen tendak nunga Myanmar (Burma) iba yimya nung odaki. Iba ama yimsusüba mapang nüburtem nem lenir shimba nung kecha temeden magütsür.

Saka kodang temzung ka lateta yur nüburtemi lenir shima yimsü südaktsudir, iba dang

ya nübur dena yimsu asuba (Democratic form of Government) ta ajar. Ochi aser tangatetba nung nüburtemi lenirtem shima yimsü südakja aru saka tanu nüburtemi sen aser rongsen nung temolung agütsür lenir shimba ajanga alima rajang kümdaktsür. Terenlok mali aser teraksa adokdangbo asenoki shimba lenirtem atalar aser aitsür. Lenir shimba mapang nung ni aser nai kechi yimya nung shilem agia shim bilemdangtsu nungdaker. Jungjunga bilemdangra Yihuda nungertemi nüktapangta tsürla long agi onseta indoktsu anir aoba mapang Yisui ajurua shibai pei dak tai mali ta bilemer pai tama long agi aontsu ashidang tai maketer shinga mali ama mesuka asutsu. Tesuiba mapang kodang election liasu, nisung aika alima rongsen agi tenuk pokdaktsu, Tsungrem aküm metsubu aser sobaliba tajung yimyatem amadoker pei ajung-sa lenir shim anungji election sulenbo item sungjang atangba tanü lokti aser kinunger-adianu tsungda nung temeim, tangatetep aser akümtsübutep samaba angur.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Khristan charity telok aikati Turkey aser Syria nung timtemertem yarir



February 06, 2023 nü Turkey nung menoknok lendong atalokba sülen anogo ana tashi nung ki chirepba jana nungi taküm mekümzüktetba ajanga February 08, 2023 nü Hatay nung asür kinüngertemi mangyimba noksa nung angur.

February 12, 2023: Tawa Khristan kibong ka lir aser iba Turkey aser Syria na nung menoknok lendong tulu ataloka nisung 20,000 dak tema asüba sülen Khristan charity telok aikati teyari mapa inyaka lendong agi kongshirtem anepaludar.

Turkey yimtiba, Ankara nung aliba U.S. Embassy-i, Turkey nung menoknok lendong ajanga America nungera nisung asem süogo, ta metetdaksü.

Turkey aser Syria na nung menoknok lendong tulu atalokba sülen Khristan organization Samaritan's Purse-i yipten 52 aliba Emergency Field Hospital ka amenok aser staff 75 yoka medical teyari agütsüdar. Iba hospital nungji emergency operating room ana lir.

Samaritan's Purse-isa tayimtsü ajanga teyari oset balala Turkey-i bener otsür.

Samaritan's Purse-i sangdong ka ajanga, "Onoki teyari mapa maneni inyakba den külemi disaster assistance specialists aser supplies maneni agütsütsü. Kibong aika timtemdar, anungji parnok atema sarasademtsüba den külemi Yisu tenung nung tenzükbä mapa inyakertem-ozü teams aser partners atema sarasademjang," ta metetdaksü.

Menoknok lendong agi kongshiba kibong aika Tenla kitem, nun tem indang convents aser Arogoi lapokba hospitals nung jenoka lir, ta Khristan melungtet telok Aid to the Church in Need (ACN)-i metetdaksü.

ACN den jembidang Aleppo nung aliba Catholic hospital nung director, Anne Marie Gagnon-i, iba hospital nung inyakertemi anibelem arema yirua alirtem yaridar, ta metetdaksü.

Laisa, menoknok lendong nung iba hospital bo mechirep, ajisüaka kiojen kaksaba ajanga lendong ajurutsüsa lir, ta metetdaksü.

"Onoki nisung ana surgye agiogo. Iba hospital nung

Khristan kibong ka lir aser iba kibong züngsemtem aika menoknok lendong nung süogo. Iba lendong nung asüba Khristan putir, Daher tasümgang onoki atadar," ta lai metetdaksü.

"Onok meyong hospital nung tesem kabo chireptsüsa lir, ajisüaka onoki yirua alirtem dak dang rangloker inyaker," ta lai metetdaksü.

"Nüburtemi Tenla kidang, convents aser hospital nung jenoktsü asüngdang. Building aika raksaogo aser ki tamentep 4buba mesüra 5buba nung alirtembo tsübur, ibayongji onoki atem nung mattress lemer parnok mejangdaksür," ta lai metetdaksü.

"Nun temi parnok meyong convents lapoker nüburtem jenokdaksür. Parnok aikati pei kidangi meyipa mouner. Onok den-a kibong pongu anenzüka lir aser kibong aika schools mesüra Tenla kitem nung jenoker," ta lai ashi.

Ano Turkey aser Syria na nung teyari mapa balala inyaker International Christian relief organizations rongnung First Hope Association, World Vision aser Send Relief densema lir.

"World Vision telokia teyari mapa inyakdar. Parnoki tanurtem aser kibongtem anepalur. Onoki süki agütsür, heaters, tzü aser healthcare service agütsür," ta World Vision-i metetdaksü.

World Vision nung Child Protection Senior Technical Advisor, Matthew Stephens-i, onoki tzü tajemtsü, sanitation aser hygiene kits agütsüba den külemi electricity, medical facilities aser sükitem agütsür, ta metetdaksü.

"Tang mongpu ya kanga majung. Kanga asüker. Rürjep alaba den tzünglu aruba ajanga teyari agütsüba maparen nung tetsükdaksü ajurur, iba denji külemi ki chirepba jana agi nisung anenbanga alirtema asür. Anungji tang kanga nungdaksü totzü aser heaters lir," ta pai

ashi.

World Vision ajangasa menoknok lendong mapang pilaba kibong züngsemtem longjemdaksütsü meranger aser maneni taruba ita ishika yaritsü tebilemba lir.

Ano külen Middle East Council of Churches-ia US sorkar dang, Syria linük anema tenokdangba balala benoka aliba agienang, ta mepishiogo.

Middle East Council of Churches-i sangdong ka ajanga US administration dang. "Onoki tangsa Syria anema benoka aliba tenokdangba balala agientsü akhanger, kechiyong ibaji ajanga dang teyari oset balala agütsütettsü. Tenokdangbatemji meimchir anema ozüng alema inyakba mesüdaksütsüla," ta metetdaksü.

"Tenokdangba balala aliba ajanga Arogoi rongsen tila ajanga dang teyari mapa inyakteter. Ajisüaka Middle East nung Arogoi ajaki pei akaba rongsen ajanga menoknok lendong agi kongshirtem yaria arudar," ta council-isa metetdaksü.

General Assembly nung clerk, J. Herbert Nelson-i, "US-i Syria anema tenokdangba balala benoker küm aika jungogo. Item tenokdangba ajanga timtemba nüburtem aser chiyungtsü agi meperiba nüburtem timtem tali bendenloksür. Talisa 2011 küm civil war tenzükbä mapang nungi nüburtem kanga timtemer," ta metetdaksü.

"Tesüiba küm ishika nungi nüburtemi pei ki aser taküm tanaben yangertsü merangba mapang nung tawa iba menoknok lendong ajanga khuret tali benlokogo," ta pai ashi.

"Anungji tenokdangba balala agienba ajanga parnok nem teyari balala agütsütettsü aser taruba hoptatem aser itatem nungbo nüburtemi pei ki aser taküm asentenshir yangertsü atema renemshitettsü," ta paisa shisem.

ANO GO ABEN TSÜNGREM DEN

Temeimi Tajungtiba Bilemer

"Temeim... ajak azüzüker, ajak amanger, ajak imlar, ajak aremer"-

1Kor. 13:7

Temeim nung telemtet maka. Temeimi kodanga mashir, "Na langra oalokogo, na meimtsü makok." Khrista mesük temeimi tangar mulung arendaka meyutsüra. Maneni meimer. Na anasa alirtemi mapa tamajung inyakaka naibo mejashitsü; parnok dang odang meimtsü ta parnoki shitettsü asü? Tangari na yirujaka naibo parnok anema kecha tamajung mebilemstü ta parnoki shitetter asü?

Temeimi tangar asoshi tajungtiba bilemer. Kari na anema mapa tamajung inyakaka, aibilenji asaa inyakba masü ta nai amanger/bilemer. Kari na aitsütsü merangdang, nai ajakji aremzüker, aser kecha tenangzüktepba makai tai atoker. Koda masü mapang sayutsüngi o agütsüba nai agizüker. Kari kecha kuli makai na atalara, nai ajak aremzüker. Nai meimba dang kodanga nai teimla mesamar. Khristai ne dang meimba ama nai tangar dang temeim mapa inyaker.

Pauli ashi, tenem ajungloksüsa pa tamang liaaka, Kotak tenyar ama jembiaka, aser miima akaba ajak angatetta shinba sempet liaka, aji saka Tsüngrem temeim melisa koda. "Junger, ni iba ama tangar dang meimtsü makok!" ta ashibaji tagizüktettsü masü. Kodang Tsüngremi na ajanga tangar dang meimer, ibaji dang pa akaba temeimji lir. 1Korint 13 nung kecha pei atema bilemba, meimba indang shia mali. Tsüngrem temeim ajunga ashiba atema tenüngsanga iba tapu zügang. Na ajanga tang ibai tangar tang ashitsü sarasadema asüngdangang.

Hindu telok kati tribal Khristantem nem teyari magütsütsü akhanger

February 12, 2023: Hindu yimsü alia amanger telok kati India nung tribal Khristantem nem sorkar scheme balala kübok teyari agütsüba nokdangtsü atema takhangba agütsür.

Northeast region nung aliba Khristan state ana nung election agitsü mapang ana nung lia tribal Khristantem nem teyari magütsütsü parnoki takhangba agütsü.

Lisopur yimsü aser sobaliba kümzüksü atema inyakba telok- Janajati Dharma-Sanskriti Suraksha Manch-i, Khristan yimsü mesüra Islam yimsü dangi meyipba tribal nisungtem Scheduled Tribes (STs) official list nungi agientsüla, ta metetdaksü.

Iba list nung alirtem nem social welfare scheme balala kübok teyari balala agütsür.

Osangbener den jembidang Janajati Dharma-Sanskriti Suraksha Manch teloki, February 12 nü parnoki Assam kübok Guwahati nung aliba state secretariat nung longkak aittsü aser state yimtiba, Dispur tashi longkak aita jajaba sülen Centre sorkar aser state sorkar naprongla dang tribal Khristantem nem sorkar teyari

balala magütsütsü atema linük temzüng yanglushiang, ta mepishitsü, ta metetdaksü.

Assam nung iba telok nung lenir, Binud Kumbang-i, tribal Khristantem teyari anasü agi tiemba angur, kechiyong parnoki pei chirnurtem Khristan school tem nung züngdaksür saka sorkar welfare mapatong kübok scholarships angur aser mapaa bushir, ta metetdaksü.

February 27 nü Meghalaya aser Nagaland na nung assembly election agitsü lia parnoki tribal Khristantem anema iba takhangba agütsü.

Meghalaya nung nütsümg million 3.28 lir aser nütsümg shilem 85 dak temabo Khristantem lir; iba nungji Catholic Khristan nütsümg 849,226 densema lir.

Alima nung Baptist nütsümg teimba alibaji tesemji Nagaland lir; nütsümg million 2 aliba state nung nütsümg shilem 90 dak temabo Khristantem lir.

Janajati Dharma-Sanskriti Suraksha Manch teloki India Tir, Droupadi Murmu aser Ato kilonser, Narendra Modi na dang yimsü meyipdaksüba nokdangtsü atema temepishiba shidi agütsütsü tebilemba lir.

AO OSHI ANGAZÜKDAK: TANÜ ANGAZÜKTSÜBA OJANG



Osü

(adj) o jembidang ola adokbayim (diction/ accent)

* Yimtsüng shia pei pei osü lir.

Osük

(n)ayi aju ajur aser tesepra terong terong adoker (reeds)

* Osük nü nung senzütsü kanga tasak.

OLONG PAITEP # 6427

Grid for OLONG PAITEP # 6427 with numbers 1-16 in various positions.

TIPIEN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. ___ adenshi - (4)
14. Tsünusenbongsü adokdak - (3)

OLONG PAITEP # 6426 TELANGZÜBA

TIPIEN :

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN :

- 1. Khu, 2. Sүjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.



SUNDAY SCHOOL NUNG :

- Tesayur : Class, Yisu ji kong lir?
Narola : Yisu ji Kodak nung lir.
Merenba : Yisu kü molungjang nung teti lir.
Akaba : Yisu ya ozü toilet nung teti lir.
Tesayur : Waa Aka, nai kodashür yamaji shiteter?
Akaba : Anepdang shia kübu saker toilet-i aodang kütsü yakta yiadoker alirji idangji kübui "Oh Yisu, na tang tashi yangi lir na?" ta ashir ati.

Tepela Tasoba Anogo. Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang. Includes a birthday cake illustration.

Imphal nung Manipur Congress office amakba aitsür



Manipur Congress general secretary Wahidur Rahman-i anir Congress Bhavan nung lungkak aitba angur.

Imphal, February 12, 2023

(Agencies): Manipur nung MPCC indang office amakba aser vice president (VP) Hareshwar Goswami'er ki amakba aitsür ta taoba Chief Minister Okram Ibobi Singh-i ashi.

February 11 aser February 12 tsüngda ayaternung yimya balaka agi Manipur Congress Party makogo, ta opposition leader Ibobi Singh-i ashi.

Iba mapang mejangjaba nisung kari petrol bomb pokloksü aser MPCC kima nung jana rongdok. Ano mejangjaba nisung kari MPCC VP Hareshwar Goswami'er kidang injang khaloktsü, ta pai ashi.

"Television sentong ka nung sensaksem dang onük nung iba mapa ya inyak ama bilemer. Item mapa inyakertem

maitsü metettsü atema bushisüng dang asütsüla" ta Ibobi-isa ashi.

"Manipur state nung democracy menentsüogo. Nübortemi sorkar tsübuba ajanga parnok tebilembatem meshiteter kechiyong sorkari parnok anema jembirtem merenshir. Iba ajanga freedom of speech & expression alenbanga aliba sayur" paisa metetdaksü.

AAP züngsemtemi Guwahati nung BJP office kima lungkak ait

Guwahati, February 12, 2023 (Agencies): Assam nung Aam Aadmi Party (AAP) züngsemtem aser pusemertemi Deobarnü Guwahati nung BJP office jakdang lungkak aitogo.

Guwahati nung AAP-i ayongba sentong ya PM Narendra Modi-i ashishitep aketba shishilembar Gautam Adani den tesentaktep aliba atema liasü.

Several Assam AAP

workers were detained by the police from the protest site. Parnoki Guwahati nung BJP office jakdang "Adani Modi bhai bhai" ta yimyim ayima lungkak ait aser idangji AAP züngsem aika police-i apu.


Hindenburg Research-i Adani group anema ken o kar benokba sülen AAP-i bushisüng dang asütsü atema takhangba agütsür aser iba ya

pusemstü atema AAP-i state balala nung lungkak aitba sentongtem ayonga agiogo.

Delhi nung Gopal Rai-i anir AAP züngsemtemi BJP headquarters kima nung lungkak aitba sentong tulu ka agiogo.

US nung amenoka aliba Hindenburg Research ajanga Adani Group-i ochimashi aser tim masüba inyakba osang ka tawa tu sayaogo.

CPIM, Congress, TIPRA Motha ajanga 'jungle raaj' bener arutsü: Amit Shah



Amit Shah

Agartala, February 12, 2023 (Agencies): CPIM, Congress aser Tipra Motha ajanga Tripura nung BJP sorkar atsüngdoker 'jungle raaj' bener arutsü meranger ta Union Home Minister Amit Shah-i tanü ashi.

Tripura Deputy Chief Minister toktepa tesem Charilam Assembly Constituency nung Union Home Minister-i iba osang metetdaksü.

"Tripura Chief Minister Dr Manik Saha aser PM Narendra

Modi nati Tripura tejakleni aotsü atema külemi inyaker saka CPIM, Congress aser TIPRA Motha teloktemi BJP sorkar atsüngdoker jungle raaj tanaben bener arutsü meranger" ta pai ashi.

"Congress nem vote enoktsüba tetetzü CPIM nem enoktsür aser Motha nem vote enoktsüba ajanga BJP tamakok ngudaksür CPIM sorkar tanaben bener arutsüba lir. Alima nungi CPIM samatsüogo aser linük nungi Congress atsüngdokogo" ta

Amit Shah-isa ashi.

Election magidang CPIM-i parnoki tamakok anguba shiogo aser ibaji Congress den tesentaktep yangluba lir. CPIM-i Congress lennir aika tepsetba sülen tang parnok den sendakteper, ta paisa ashi.

"Motha-i lisipurtem atema kodanga meinyaktettsü aser CPIM, Congress o Motha ajanga Tripura renloksü atema meinyaktettsü" ta Union Home Minister-isa ashi.

"BJP-i tarutsü anogotem Tripura nung tashidak, sensak tia aser mapa manguba khurettem agientsü atema inyaktsü. Nü indang vote ka agi MLA, Chief Minister mesüra Deputy Chief Minister shimtsüba masü saka Tripura azükarudaktsütsü" ta paisa ashi.

"CPIM aser Congress sorkartem kübok ochimashi aika inyakogo. Ni Manik Sarkar dang pai ochimashi indang osang tejangja meshir. Kechiba Tripura nungeri ochimashi CPIM nem vote enoktsütsü?" ta Amit Shah-isa ashi.

Format C-2

(For political party to publish in website, newspapers, TV)

Declaration about criminal antecedents of candidates set up by the party
(As per the judgment dated 25th September, 2018 of Hon'ble Supreme Court in WP(Civil)No. 536 of 2011 (Public Interest Foundation &Grs. Vs. Union of India & Anr.)

Name of Political Party: **BHARATIYA JANATA PARTY**
Name of Election: General Election to the Legislative Assembly of Nagaland, 2023.
Name of State/ UT: **NAGALAND**

1	2	3	4	5			
S I L O N O	Name Of Constituency	Name of Candidate	(A) Pending criminal cases		(B) Details about cases of conviction for criminal offences		
			Name of Court, Case No. & status of the case(s)	Sections of the Acts concerned, brief description of the offence(s) of			
1.	21-TULI (ST)	A. PANGJUNG JAMIR	Special Judge NIA DIMAPUR CASE NO.: NIA CASE RC 1/2016. RC 01/2016/NIA-GUW Dated 18.08.2016. ChargesheetNo.01/2017. Order of Cognizance against him has stayed by the Hon'ble Kohima Bench of the Hon'ble High Court of Guwahati vide order dated 06.08.2018 in WP (CRL.) 4(K) OF 2018.	384 IPC Sections 25(1-b) Arms Act Section 7 & 8 NSR, Section 13 Drugs and Cosmetics Act Section 10 & 13 UA (P) Act, Section 39 & 40 of UA (P) Act. (Extortion, Acquiring Arms that has been specified in that notification of contravention of that section, Penalty for Subversive Acts, Punishment for carrying or possessing Arms, penalty for being member of an unlawful association and punishment for unlawful activities, Support given to a terrorist organization, raising funds for a terrorist organization.) Allegations are that while serving as a Govt. Officer in the land resource department of Government of Nagaland NIA alleged that I supported the the terrorist organization NSCN(K) and I have given government fund to NSCN(K).	NOT APPLICABLE	NOT APPLICABLE	NOT APPLICABLE

MULUNGNEN O



TALINOKTSÜNG
(Aliba Village)
(Aso: 26th April 1951 - Asü: 4th February 2023)

Onoki teti meima aliba Asür TALINOKTSÜNG akümüli wadang renemer teti anisüngzükdaki aoba mapang kija, kibong, arogo, yimten, kidong, pur medemsor aser lokti tentet balala-i tamang sarasadem, nübu aser ali rongsen agi ozü kibong nungita yariba asoshi nenok ajak dang kanga pelaba lemsateper.
Nenok temeim mapa asoshi asen teyanglur Tsüngrem-i teti moajang ta ozü sarasadem.
Temeim Kinungtsü aser Kinungertem

TARGET NPSC 2023

NEXT BATCH AFTER ELECTION - 6TH MARCH

PRELIMS
PREPARATION

MAINS
PREPARATION

INTERVIEW
PREPARATION

WITH
NSSB



QUALITY TEACHING

QUALITY MATERIALS

QUALITY TEST SERIES

QUALITY PREPARATION

RS. 45,000/- ONLY JOIN TODAY

TARGET UPSC 2024

GS FOUNDATION | OPTIONAL PSIR | HISTORY

Russian sepaitem rara tenzüker mezüing hopta dang nungi tang timba asür

Kyiv, Tsüklai/February 12 (Agencies): Russia nungeri Ukraine amak tenzüker mezüing hopta Ukraine nung Russian sepaitem asüba sülen tang timba asür, ta Ukrainian data ajanga ashir.

Ukrainian data ajanga sayuba nung February ita anogoshia Russian sepa 824 asür. Iba osang ya UK indang Ministry of Defence ajanga sangdong. Iba sangdong ya tejangja meshiteter saka UK-ibo ya shidak alitsü ta ashir.

Ukraine anüdoklen Russian sepa 824 asüba ya June aser July mapang sangdongba dang pezüben agi timba lir, iba mapang anogoshi Russian sepa 172 asü.

Rara tenzüker Russian sepa 137,780 süogo, ta Russian military ajanga ashir.

Training shidak agir aliba sepa 137,780 süogo, ta Russian military ajanga ashir.

Ajisüaka Luhansk aser Donetsk indang governor tem densema local politician kari asendenshir amak tenzükerogo ta ashir.

Kanga sashia raraba ya linük anüdoklen Bakhmut temeket nung lir.

Russia indang Wagner mercenary force tekolakbai raksatsür aliba yimti anasa nisung aliba tesem ka par teloki amokbangogo, ta Deobarnü ashir.

"Wagner PMC indang assault detachments ajanga Krasna Hora tesem tanü agiogo," ta Yevgeny Prigozhin-i Telegram nung ashir.

Bakhmut nung temolung agütsüba ya mangateter saka yangji mapang talangka raraba ajanga iba tesem ya sempet ka ama kumdaktsü.

UK ajanga sangdongba Ukrainian data nung ashiba agi, anogo ka nung Russia nunger sepa 824 asüba ya June aser July mapang sangdongba dang pezüben agi timba lir, iba mapang anogoshi Russian sepa 172 asü.

Rara tenzüker Russian sepa 137,780 süogo, ta Russian military ajanga ashir.

Training shidak agir aliba sepa 137,780 süogo, ta Russian military ajanga ashir.

Ajisüaka Luhansk aser Donetsk indang governor tem densema local politician kari asendenshir amak tenzükerogo ta ashir.


Kanga sashia raraba ya linük anüdoklen Bakhmut temeket nung lir.

Russia indang Wagner

YES, YOU CAN BECOME THE NEXT



IAS



NCS

GIRLS PG IN CAMPUS

BOYS PG IN CAMPUS

CALL NOW @7005114715
ADMISSION OPEN

EduVersity
NPSC PREPARATION 2.0

OFFICE OF THE
26 Aonglenden Mandal
BHARATIYA JANATA PARTY
Headquarters: Mokoklchung - 798601

LETTER OF RESIGNATION

We the supporters of Shri. Toshipokba Longkumer. The BJP Aonglenden Constituency of various frontal organizations hereby tender our resignation to support Toshipokba Longkumer the son of soil who loves the people of 26 Aonglenden and Naga as a whole. He was denied the BJP ticket despite our relentless effort and his support through thick and thin accumulating the favouritism and membership to strengthen the party and set up a nominal candidate for the Mokokchung district.

It is with a heavy heart that we tender our resignation because we love the party and we performed the best among the Mokokchung Constituencies but the voice of the Karyakartas were not heard and delivered.

Following are the names of the Members (244) who resigned from BJP 26 Aonglenden Mandal:

- i. From Mandal Office led by Vice-President and General Secretary 32 members resigned.
- ii. From ST Morcha led by President and General Secretary 30 members resigned.
- iii. From Yuva Morcha led by President and General Secretary 28 members resigned.
- iv. From Kisan Morcha led by President 14 members resigned.
- v. From Mahila led by General Secretary 9 members resigned.
- vi. From Minority Morcha led by President and General Secretary 30 members resigned.
- vii. From booth level committee 111 members resigned.
- viii. From IT Cell 2 members resigned.
- ix. From Shakti Kendras 4 members resigned.
- x. From Ex-Servicemen 1 members resigned.

Real Madrid-i Club World Cup kokogo



Tsüklai/February 12, 2023 (Agencies): Rabat, Morocco nung Club World Cup asaya final nung Real Madrid-i goal 5-3 agi Saudi Arabia club Al-Hilal koka otsü tasen ka yanglua iba asayamung pongubenbuba kokogo.

Asaya nung Vinicius Junior-i goal ana idaktsü aser Karim Benzema-i goal idaktsüba nung teyari agüja liasü. Kasa mapang nung Federico Valverde-ia Real atema goal ana idakja liasü.

Al-Hilal puri asaya amokbanger masayatet saka parnokia goal idaktsüteta asayaogo. Parnok rongnungi Luciano Vietto-i goal ana aser Moussa Marega-i goal ka idakja liasü. Parnoki semi-final nung

Brazil club Flamengo koka final tongteta liasü.

Madrid-i tatemsa iba asayamung 2018 küm koker lir. Parnok 2014, 2016 aser 2017 kuma iba asayamung kokogo.

Asaya metenzük tsüingda Ancelotti-i Benzema asayatsü masayatsü mejangja ta ashi ajisiüaka pa tetenzük nungi asaya liasü. Pa Madrid pur asaya tesüsuba ana nungbo masayatet, kong semi-final nung Bodhbarnü Egypt club Al Ahly goal 4-1 agi akokba densema lir.

Asaya nung mezüingbuba goal ya Benzema-i kanga junga yanglutsüba sülen Vinicius-i idakja liasü.

Asaya nung minute 18buba nung Al-Hilal puri ball junga

memetsütoktetba sülen Valverde-i metsüba ball ka defender ka dak tsükdaker goal keeper Al-Mayouf adena ai.

Ajisiüaka asaya tetenzüklen pass asem tashi mesüteti asayaba nungi meyipa arur Al-Hilal pur atema Marega-i goal ka idaktsü.

Iba goal idaktsüba sülen Al-Hilal pur tera süngjemshia aküm ajisiüaka Vinicius-i ball tajung ka agütsüba sülen Benzema-i par telok atema minute 54buba nung tasembuba goal idaktsü.

Maneni Valverde-i minute 58buba nung pa asoshi tanabuba goal idakja liasü.

Al-Hilal atema Vietto-i minute 63 aser 79buba nung goal ana idakja liasü.

Southampton-i manager Nathan Jones mapa nungi anentsüogo



Tsüklai/February 12, 2023 (Agencies): Southampton-i parnok indang manager Nathan Jones Deobarnü mapa nungi anentsüogo. Jones lenisüba nung ita asem club asayaba mapang parnoki Premier League nung asaya ka dang koka league table ponglang nung lir.

Jones ya November ita World Cup break agitsü anogo ishika lia Ralph Hasenhüttl melena shim aser iba season nung Southampton-i manager mapa nungi anentsüba tanabuba coach kümogo.

Southampton pur FA Cup round pongububa tonga

asayaogo aser League Cup nunga Manchester City akokba sülen semi-final tonga asayaogo, ajisiüaka league nung relegation zone nungi matokteti lir.

"Tebur first team manager Nathan Jones den pilaba Southampton Football Club-i jangjashitsür. First team coach Chris Cohen aser Alan Sheehan natia club toktsüogo," ta club sangdong ka ajanga metetdaktsü.

Jones lenisüba nung Southampton pur league asaya ti asayaogo aser parnoki taoba ita Everton kija koka lir, shirnoka ponglang nung kanga timtemba

mapang ka lir.

Jones-i anir tatemsa Honibarnü Wolverhampton Wanderers den asaya aser parnoki iba asaya goal 1-2 agi mekoki liasü. EPL nung asaya 22 asayaba sülen parnoki tang tashi nung point 15 dang nguteta lir aser safety zone atongtsü point pezü nungdaker.

Asaya aika junga masayatetba den jenbotsü lenmang aika bushiba sülen Jones mapa nungi anentsütsü imla liasü aser kasa mapang nung pai St Mary's Stadium nung parnok pusemertem atsüa marutetba ajanga pa jenjang mejungi akum.

Iba ita tetenzüklen goal 3-0 agi Brentford makokba sülen arishi küm 49 tain coach ya kanga mejungi aija liasü. Fan temi nongshiba ajanga pai pa inyakyim melenshitsuä aküm tashi ashiba ajanga pa aija liasü.

Iba sülen pai tamakok anguba ya pai tai ta nangzük ajisiüaka menoatoker liasü aser fan temi "nai kechi inyaker aji naia memetet, onok club toktsür oang ta," ayimdena liasü.

Southampton-i ashiba agi, first team lead coach Ruben Selles lenisüba nung training agia atatsü aser taruba Honibarnü Chelsea den asayatsü aliba asaya atema team renemtsü.

Australia-i left-arm spinner

Kuhnemann anisemogo

Tsüklai/February 12, 2023 (Agencies): India den tanga asaya aliba Test asayamung atema Australia nung left-arm spinner Matthew Kuhnemann team nung züingoksemogo, ta Cricket Australia-i taruba hopta tanabuba asaya metenzü tsüingda Deobarnü metetdakja liasü.

Mitchell Swepson'er tanung mezüingbuba asotsü aliba ajanga pa kidangi meyipa aotsüsa akümba sülen Kuhnemann ya team nung züingoksema liasü.

Kuhnemann team nung züingoksema sülen Australia team nung Ashton Agar den külemi left-arm spinner ana akümtsü. Ashton Agar-a Nagpur nung India-i inning ka aser run 132 agi akokba asaya nung shilem magi-i liasü.

Australia head coach Andrew McDonald-i ashiba

agi, Hokolbarnü nungi tenzüka Delhi nung asayatsü aliba test asaya nung Kuhnemann mezüingbuba asayatsü akok.

"Onoki spinner asem asayadaktsünera team nung asayar talila yua ataner," ta head coach Andrew McDonald-i ashi.

Swepson shiba Nagpur Test nung masaya pa Brisbane-i meyipa aotsü aser tanungba team tanabuba Test asaya atema renemshi tenzüktsü.

Temeyong yirua mezüingbuba Test nung masayatetba sülen all-rounder Cameron Green-a tanabuba Test nungbo asayatetsü Australia-i imla atadar.

Tanabuba Test nung Mitchell Starc-a asayatetsü akok, ajisiüaka captain Pat Cummins-i, Nagpur nung asayaba asayartem melenshitsu atema kecha tebilemba mali ta shiogo.

Sindhu-i anir Badminton Asia Mixed Team C'ship asayatsü



Open nunga mezüingbuba round nung tsükatok, ajisiüaka la asayaba yimya dak kanga temulung asür ta lai shia liasü. "Ni temang kanga junga kümogo. Tekolok sisatsü aser shitemang ajak kanga junga lir. Yirutsüji yimya dang ajisiüaka temang anepalua alitsü aser tashitaitba meyipa arutsüji kanga tongtibang. Ni kūsasa dak kanga temulung alemer aser aibelen nungi angazüka arudar," ta arishi küm 27 tain asayar yagi Badminton World Federation dang ashi.

"Kü tsürapurtema asayar liasü, parnoki ni nongita yariba aser ajungshiba ajanga ni tejakleni aotsü atema tashi agütsür," ta laisa shisem.

Sindhu-i taoba küm Syed Modi India International, Swiss Open aser Singapore Open kokogo aser taküma HSBC BWF World Tour nung kasaji takok angutsü imla atadar.

Lakshya Sen aser HS Prannoy na den külemi Sindhu nung lenisüba nung India team Badminton Asia Mixed Team Championships nung asayatsü, koba Dubai nung Mongolbarnü tenzüktsü.

India team 2019 küm Hong Kong nung iba asayamung asayaba mapang knockout stage tonga masayatet aser taküm parnok Group B nung UAE, Malaysia aser Kazakhstan den ata lir.

Tsükali/February 12, 2023 (Agencies): Tetsüing tabelen raksa ita pongu tashi masayatetba sülen India tsürtem rongnungi nungtugu badminton asaya PV Sindhu tang temang kanga tajungba kümogo aser taküm junga asayatsütsü temulung lema bilema lir.

Olympics nung medal ana tashi ngur aliba asayar Sindhu-i, la yirur aliba kanga junga anepogo aser taküm takokba tashi bendanga asayatsü renema lir ta shiogo.

Taoba küm August ita Birmingham Commonwealth Games tetsür kija asaya nung gold anguba sülen Sindhu yiruba ajanga mapang talangka masayatet aser taküm mezüingbuba Petronas Malaysia Open 2023 nung asaya ajisiüaka la mezüingbuba round nung Spain tsür Carolina Marin-i tsükdakja liasü.

Iba sülen la kidang India

BILEMDANGANG

"O tanep agi nisung mulung sunepdaksür."